

**JAMHUURIYADDA
SOMALILAND**



**REPUBLIC OF
SOMALILAND**

**XAFIISKA GARYAQAANKA GUUD EE QARANKA
SOLICITOR GENERAL OFFICE**

FAAFINTA RASMIGA AH OFFICIAL GAZETTE

النشرة الرسمية لجمهورية صوماليلاند

Sannadka 5aad

Cadad Gaar ah

22/06/2016

**XEERKA LA DAGAALANKA
MUKHAADARAADKA
XEER LR. 21/2002**

Email: garyaqaankaguud@gmail.com

Web: www.garyaqaankaguud.com

REPUBLIC OF SOMALILAND
THE PRESIDENT



REF: JSL/M/DEC/222-131/32002

DATE....11th March, 2002

DECREETO MADAXWEYNE NO:131/2002

Madaxweynaha Jamhuuriyadda Somaliland

Markuu helay:

Go,aanka GW/KF-16/208/2002 ee
17/02/2002 uu Golaha Wakiiladu ku
ansixiyey Xeerka la-dagaalanka
mukhaadaraadka Xeer No: 21/2002
iyo go,aanka Golaha Guurtida ee
GG/JSL/77/11/2—1 ee 17/11/2002

Markuu arkay:

Qodobka 75aad ee Dastuurka
Jamhuuriyadda Somaliland.

Wuxuu

Soo saarayaa Xeerkan oo lagu baahinayo dhaqan- galka Xeerka
Xeerka No: 21/2002 ee ku saabsan LA-DAGAALANKA
MUKHAADARAADKA.

Waxaana lagu soo saari doonaa faafinta rasmiga ah ee dawladda.

Allaa Mahad Leh,

Maxamed Ibraahim Cigaal

madaxweyne

JAMHUURIYADA SOMALILAND
GOLAHA WAKIILADA

GW/KF-16/2008/2002

17/02/2002

GO'AAN ANSIXIN XEERKA LA-DAGAALANKA MUKHAADARAADKA (Xeer Lr.21/2002)

GOLAHA WAKIILADA JSL

Markuu Arkay:

Qodobada 5aad, 16(4)aad iyo 128(1)aad ee Dastuurka oo ku saabsan in shareecada Islaamku saldhig u tahay xeerarka & shuruucda JSL lagaga dhaqmayo, wixii ka soo horjeedaana yahay waxba kama jiraan.

Markuu Tixgeliyay:

Mashruuc-sharciga ku saabsan Mukhaadaraadka ee Golaha Guurtidu curiyey, una soo gudbiyey Golahan, si uu xeer uga soo saaro.

Markuu is Tusay:

Baahida loo qabo xeer lagu xakameeyo mukhaadaraadka ku soo faafaya dalka taas oo ku iman karta wax ka bedel lagu sameeyo xeerarka u yaala.

Markuu Dhagaystay:

xogwaranka Xeer-ilaaliyaha Guud ee Qaranka iyo Wasiirka wasaaradda Awqaafta iyo Arrimaha diintu ka bixiyeen mukhaadaraadka iyo talooyinka ay ka soo jeediyeen la dagaalankeeda

Markuu u codeeyay:

ansixinta Mashruuc-sharciga La-dagaalanka Mukhaadaraadka, fadhigi 17/02/2002 oo ay goob-joog ahaayeen 45 Mudane,

WUXUU

Cod aqlabiyad ah (41 cod) oo gacan taag ah ku ansixiyey **Xeerka La-dagaalanka Mukhaadaraadka (Xeer Lr. 21/2002)**, halka 1 Mudane ka diidey, 2 Mudane oo kalena ka aamuseen, Gudoomiyuhuna aanu cod bixin sida u caadada ah.

ALLAH MAHAD LEH


Maxamed Xuseen Cisman

XOGHAYAHA GUUD G/WAKIILADA




C/qaadir X. Ismaciil Jirdeh

K/S GUDOOMIYAHA G/WAKIILADA

Jamhuuriyadda Somaliland

GOLAHA WAKIILADA

XEERKA LA DAGAALANKA MUKHAADARAADKA
(Xeer Lr. 21/2002)



GOLAHA WAKIILADA JSL

Markuu Arkay: Qodobada 5aad, 16(4)aad iyo 128(1)aad ee Dastuurka Qaranka oo ku saabsan in Shareecada Islaamku saldhig u tahay xeerarka & Shuruucda lagaga dhaqmayo, wixii ka soo horjeedaana yahay waxba kama jiraan.

Markuu Helay: Mashruuc-sharciga ku saabsan mukhaadaraadka ee Golaha Guurtidu curiyey, una soo gudbiyey Golahan.

Markuu Dhagaystay: xogwaranka Wasiirka Awqafta & Arrimaha Diinta & Xeer-Ilaaliyaha Guud ka bixiyeen mukhaadaraadka iyo talooyinka ay ka soo jeediyeen la dagaalankooda.

Markuu Ku Qancay: Baahida loo qabo xeer la socon kara wakhtigan oo lagu xakameeyo mukhaadaraadka dalkeena ku soo faafaya

WUXUU ANSIXIYEY XEERKAN



Qodobka 1aad

MACNAHA EREY-BIXINTA

Maandooriye: waxa loola jeedaa shay kasta oo isticmaalkiisu bedelo xiska Aadamaha oo keeni kara sakhrad muddo dheer ama muddo gaaban sifa kasta ha lahaadee.

Isticmaalka: Waxa loola jeedaa sifa kasta oo loo qaato maandooriye sida cabbid, qiijin, ursasho, turqin irbad, shidasho, cunid IWM.

Caadayste: Waxa loola jeedaa qof kasta oo bariinsaday isticmaalka maandooriye ee lagu cadeeyay sida xeerkan tilmaamayo.

Qodobka 2aad

REEBANAANTA MAANDOORIYAHA

Beerista, samaynta, ka ganacsiga, soo galinta, haysashada iyo isticmaalka dhamaan maandooriyayaashu way ka reebban yihiin gayiga Somaliland.

Qodobka 3aad

ISTICMAALKA MAANDOORIYAHA

1. Qofkii isticmaala maandooriye ee ay Maxkamad horteed kaga cadaato waxa lagu cigaabayaa karbaash dhan afartan (40) jeedal

iyo lix bilood ilaa hal sano oo xadhig ah aan iib lahayn.

2. Qofkii ku isticmaala maandooriye meel fagaare ah ama dadweynaha u furan ama sakhrad ku muuja meel fagaare ah ama dadweynaha u furan waxa lagu ciqaabayaa ciqaabta ku xusan faqradda laad ee qodobkan, waxa kale oo loogu siyaadinayaa ganaax dhan 500,000 Sl. Shillin ilaa 1,000,000 Sl. Shillin oo hadduu bixin waayo loogu bedelayo xadhig u dhigma.
3. Qofku hadduu yahay mid caadaystay isticmaalidda maandooriyaha waxa lagu ciqaabayaa karbaash dhan afartan (40) jeedal amah al sano ilaa laba sano oo xadhig aan iib lahayn iyo ganaax lacageed oo dhan 2,000,000 Sl. Shillin oo haddii uu bixin waayo loogu bedelayo xadhig u dhigma.
4. Caadayste waxa loo aqoonsanayaa qof kasta oo ay maxkamad horteed kaga cadaatey isticmaal maandooriye afar jeer ugu yaraan.
5. Qofkii siiya maandooriye qof da'diisu ka yar tahay 15 sano ama qof xiskiisu dhiman yahay ee maxkamad horteed kaga cadaato waxa lagu ciqaabayaa xadhig dhan saddex sano oo ann iib lahayn iyo ganaax lacageed oo dhan 1,000,000 ilaa 2,000,000 Sl. Shillin oo haddii uu bixin waayo loogu bedelayo xadhig u dhigma.
6. Qofkii u qariya ama ku khasba qof kale shay maandooriye ah ama cunto ku dara ee dadweynaha u soo bandhiga ee ay maxkamad

horteed kaga cadaato waxa lagu cigaabayaa cigaabta ku xusan faqradda 5aad ee qodobkan.



Qodobka 4aad

KA GANACSIGA, SAMAYNTA, SOO GALINTA MAANDOORIYE

1. Qofkii dalka soo galiya ama beera ama sameeya ama ka ganacsada ama si uun u haysta maandooriye ee lagu helo waxa lagu cigaabayaa xadhig dhan saddex sano ilaa shan sano oo aan iib lahayn iyo ganaax lacageed oo dhan 3,000,000 ilaa 5,000,000 Sh. Shillin oo haddii uu bixin waayo loogu bedelayo xadhig u dhigma.
2. Waxa la baabiinayaa dhamaan maandooriyihii la qabtay, kii la beeray, qalabkii lagu beeray ama lagu sameeyay.
3. Wadaha gadiidka dalka soo galiya maandooriye nooc kasta oo uu yahay (mid dhul, cir iyo bad) ee ay maxkamad horteed kaga cadaato waxa lagu cigaabayaa cigaabta ku xusan faqradda 1aad ee qodobkan.
4. Gaadiidka lagu qabtay maandooriye ee ay maxkamad horteed kaga caadaatey waxa marka koowaad lagu cigaabayaa ganaax lacageed oo dhan 5% qiimaha gaadiidka iyo digniin qoraal ah oo la siinayo mulkiilaha. Marka labaad waxa la ganaaxayaa 10% qiimaha gaadiidka, marka saddexaad waa lala wareegayaa.

5. Deganaha guriga (dhismaha) lagu iibiyo maandooriye ee ay maxkamad horteed kaga cadaato waxa lagu ciqaabayaa ciqaabta ku xusan faqradda laad ee qodobkan iyadoo digniin qoraal ahna la siinayo marka koowaad mulkiilaha guriga, marka labaad ee lagu helo waxa mulkiilaha guriga lagu ganaaxayaa 2% qiimaha guriga, marka sadexaad ee lagu helo waxa lagu ganaaxayaa 5% qiimaha guriga, marka afraad ee lagu helo waa lagala wareegayaa dhismaha.

Qodobka 5aad

BEDELAAD IYO BURIN

Xeerkani wuxuu bedelayaa qodobada 411, 412, 413, 414, 415, 416, 417, 342 iyo 343 ee Xeerka Ciqaabta Guud, waxa kale oo uu burinayaa xeer kasta oo ka soo horjeedaa.

Qodobka 6aad

DHAQANGALKA

Xeerkani wuxuu dhaqangelayaa marka Barlamanku ansixinayo, Madaxweynaha Jamhuuriyadda Somaliland saxeexo.

Maxamed Xuseen Cisman

C/Qaadir X. Ismacil Jirdeh

Xoghayaha Guud G/Wakiilada

K/S Gudoomiyaha G/Wakiilada

